

ጳውሎስ ገላትይ መረጃ ከተሰራሰቡት እጉስ

ኢስ ጡምስተኔሃ ጠወኦኖ እንጂል ላገት ጉዕመ ቤቸን ዱዱብስንተን አይሁደ እህቡ መኑ ቶገንስ መርቶ ጌስ «አመዕናኑት እኮተ መስ ሕገ አኡ ሀስሰኖንዶ ሀስሰኖበአ?» ይታ ጠዕምቱት ኬኦኡ፤ ቀቅቶ እስያን ሮም ገሾን እኮእ ገላቲያን ሄኣ አመዕናኖ በላን «መኑ መገን ብሬን ፈየ እሂን ጠለዕል ኢሳን አመዕኑ እሁዕነ መሲ አዲን ኣስሞ ሕገ አኡ ሀስሰኖ» ይተን ጳውሎስ ግባ መኑ ሄኣ እቅ።

ጳውሎስ ካን ገላትያ መረጃ ከተሰራሰቡት ትምርቱን ጉረተ ኣሳስ መነ ጌጥዬ አመዕነት ዋቃሃ አዋንሲሃት፤ ጳውሎስ መሲህ ኢስ አሳቤቹ እሁስ ተፈገጭ ጀመረኖ፤ አሳቤቹ እሆተ ገኤሲሁ መገን ቤሉ መነ እሁ ሆጉስለከ እስ ሶቀሙ አይሁደ እህበ መረጃ እሁስ ሂር ኩለኖ፤ መጨረሻ ፎሎጭ ኣዜን አመዕነት ዋቆሁ ኢሳን አመዕነን ደገመኖ ኢታች ቡቀኖሃ እሁስ ኩለኖ።

መጻፉስ አፎሃ

እጉስ (1፡1-10)

ጳውሎስ አሳቤቹ እህስ ሹምነቱ (1፡11—2፡21)

መገን ኣስቶ እንጂል (3፡1—4፡31)

አመዕነቲን ነጠ ፋሉለከ ሹምነቱ (5፡1—6፡10)

መጨረሻስ (6፡11-18)

1-2 ኣን አሳቤቹ ጳውሎስለከ ኢን ሜጡብ ዮ አመዕናኑት ጉዕመንከ አመኦሱት ገላትይ ባዶን ዮ አመዕናኑት ሶንኮምሃን፤ ኣን አሳቤቹ እኮም መረኛ ህከረንገ መን አዲን እሁዕነ መሲህ ኢሲንለከ ኢስ ፊሆች ኬሾ ኣን መገኒት።

3 ኣናኔ መገን አዲችለከ ቀርቶ መሲህ ኢሲች ኣስቱትለከ ወገሬቱሁ ክዕኔሃ እሁን።

4 ኢስን ከን ሂለ ዘማኒች ፊሶኔተ ኣናኔ መገን ሰውቲን ጨብሀኔ ገወሰ ህግሽ ኣሴእ።

5 ዘላለሚሃ መገኒሃ ኬዕምኙ እሁንስ! ኣሚዕን።

ሀንቅ እንጂሉ ሜጡ እሁስ

6 መሲህ አሰቶን ገኤህዕኔ መገን አዲች ደዕልቴን አደ እኬን ዋሎ ተሸት ላገቤቹ ፈንቀሉክዕኔ አጀብሲሰኖኤ።

7 ህካን ያሚሁ ጉረተ አግሶተለከ መሲህ እንጂል ላገተ ሾክሶተ ሀሳ መት-መቱ መኑ ዮቤቺሃት ቤሉ ዋሉ እንጂል ላገተ ዮቤቺሃበኤ።

8 ጠዉ እኮጎሬ ዋዕነ ዱዱብሰኖንክዕኔ እንጂል ላጋን ቶቀምባሃ ዋሉ ነኩ እንኮምዕቃ ሰሜ መላይከት እኮ እቃ ዱዱብሰቶህዕኔጎሬ ቦሮረንቶኢሃ እኩን።

9 ወዕናሃ ይኖንክዕኔገ አኒሁ ቴሁ ያንክዕኔ፤ አዪሁ አዕኑ ቶጌንተ እንጂል ላጋ ቤሉ ዋሉ ቶቀምባ እንጂል ላገተ ዱዱብሴህዕኔጎሬ ቦሮረንቶኢሃ እሁን።

10 ህከረ አን ሀሳሚሁ መኑ ገላትጮኤታትንዶ? ህከረንገ መገኑ ገላትጮኤታት? ህከረንገ አን መነ ሙንዲሲሶተ ሀሳሚት? ቴሶ ኢላ መነ ሙንዲሲሶተ ሀሾም እቃን መሲህ ካዲንቹ እሆተ አታላምበኤ እቅ።

ጳውሎስ ገእምሁ መገን አዲች እሁስ

11 አመኤ ኦሶ! አን ዱዱብሴንክዕኔ እንጂል ላገት መኒች እሁ ሆጉሴ ደኅኖተ ሀሳም።

12 መሰንትሶ ህካን ኤሳሃ ደግሰሾኤሁ መሲህ ኢሳት ቤሉ አን ቶሳሚሁ መኒችበኤ፤ ህከረንገ መኑ ተማርሰኖኤበኤ።

13 ወዕና አይሁድ አመዕነቶን ዮም ወክት ሀት ዮም ጎሬ ሞጮጮቴንታኤ፤ አመዕናኑተ ሸረን ቤሶተ አጳማሚት እቅ።

14 አይሁድ አመዕነቱ አገሪን ዘሬኤ በሊች ኢ ደረቦች ጉዕሚችን በተአምየ እቅ፤ ህትን አናከኤ ሴረ በአኖበኤገ ጠረኝሽ ሀሳም እቅ።

15 ጠዉ እኮጎሬ እለሙዕነ ሄጭ መገኑ መጠሮኤ፤ አሰቶንከሰ ገኤኤ።

16 አይሁድ እህበ መኒሃ ቤትሰተኔሃ ተሸት ላገተ ዱዱብሶተ መገኑ ቤቱስ ለሊሶኤተ ኢቲ ወክት አን አዬኒ አማዕለሞምበኤ።

17 ህትን ኢች ብርተ አሳበተ እኮሀኑኤቤቹ ደቀሞተ ዬሩሳሌም ከተመ መሮምበኤ፤ ጠዉ እኮጎሬ ሄጭ አረብ ባዱ መሮም፤ ህከኒች ኤተሮን ደማሰቆ ከተመ ፈንቀሎም።

18 ሰሶ ዘማኒች ኤተሮን ኬፋ ዬኖ ጴጥሮሴ ለኦተ ዬሩሳሌመ ኦሮዕይ እሲን ሜጡበ ቶነ ኦንቱ በር ዱንኬም።

19 ጠዉ እኮጎሬ ቀርቾ ኢሰ አመቤቲ ያቁብ ቤሉ አሳባች ዋሉ መቱሃ ለዕዮምበኤ።

20 ኩ ከተቦንክዕኔሁ ክዝብ እሁ ሆጉሰ መገን ብሬን ተፈገጭ ኩላንክዕኔ።

21 ህከኒች ኤተሮን ሶርይለከ ክልቅይ ባዱ ኦርዕዮም።

22 ይሁድ ባዶን ዮ አመዕናኑት ሚንተ ሚኔን ለአቀንት ከሰበአ።

23 ጠዉ እኮጎሬ እሰ «ወዕና ኔሳሃ ኦርሰኖኔ መንቹ ወዕና ቤሶተ አጸመን ሄዕዮ አመዕነቱ ገወንኩሰ ዱዱብሰኖት» ዬኖሃ ሞጮጭቶ እቅ።

24 ኢ መሳን መገኑ ገለትጭታኢት እቅ።

2

ጳውሎስ አሳቤቹ እሁሰ ዎሎ አሳበቤችን ደገሙሰ

1 ቶነ ሾሎ ዘማኒች ኤተሮን በርናባሴን ሜጡበ ዬሩሳሌመ ፈንቀል ኦርዕዮም፤ ቲቶ ኢን ሜጡበ አእ መሮም እቅ።

2 ህከ ቤቹ መሮሚንኩ መገኑ ለልሾኤ አዲነት፤ አን ከኒች ብርተ አዕዮም ሆጉትለከ ቲሁ አአሚሁ ህትን ተሰ እህናበእገ ይ አይሁደ እህበ መን በላን ዱዱብሴም እንጂል ላገተ ሎርሎረ አዎንሳኖተ አደ አዕይ ኩሎንሰ።

3 ኢን ሜጡበ ሄዕዮ ቲቱ ግሪክ ባድ መንቹ እኮጎሬሁ ጡርከመሞተ ግድሴማሰበአ።

4 ጠዉ እኮጎሬ በላንከኔ ሉኩት ማጠንት ኣጎ መት-መቱ ክዝብ አመዕናኑት ቲቱ ጡርከመሞተ ሀሶ እቅ፤ ሁኩ መናከት ዳንድቶተ ኣዘኔ ማጠንት ኣጎኢሁ መሲህ ኢሲን ደዕኖም ሰዎልድመተ ወልቅሰ ርሶማን ፈንቀሽቶተ ሰውይቲት።

5 እኮጎሬ ነኡ ተሸት ላገ ሀንቅ ክዕኔቤችን ጠረኝት ሄኣተ ቀዎ ጌሲሃ ህከኑኡሃ ቄለሞምበአ።

6 መገኑ መን ሚንተ ለዕይ ሀዕለኖበእቤቹሃ ሁኩ አዎንሳኑተ እኮእሩ መ መነሃ እኮጎሬ ኤሳሃ ግዱ ዮኤበእ፤ እሰ አን ዱዱብሴም ተሸት ላገ አሌን መቱ ሃዕርርቹሃ በርግቶበአ።

7 ጠዉ እኮጎሬ ህከን ወጥ ጴጥሮሰ ተሸት ላገተ አይሁዲሃ ዱዱብሶተ ኤገት ኣሰሞሰ ሃሌን ኤሳሃ አይሁደ እህበ መኒሃ ተሸት ላገተ ዱዱብሶተ ኤገት ኣሰንቶኤገ አጥራመቶኤ።

8 መሰንትሰ ጴጥሮሴ አይሁድ መኒሃ አሳቤቹ አዕዮ መገኑ ኤሳሁ አይሁደ እህበ መኒሃ አሳቤቹ አዕዮኤ።

9 ቱቅገ እክ ለልታ አሳበት ያቁብ፤ ጴጥሮሰለከ ያህይ መገኑ አዕዮኤ ኣሰቱተ ደጎ ወክት ነኡ አይሁደ እኮበእ መንቤቹ መርኖተ

እስ አይሁዲቤቹ መርቶት አማዕለንት ኤሳላከ በርናባሴ ሜጡብ እህኔ መላተ እሆተ መኬ አንጋን ዚያርቶኔ።

10 መቼ ጠወ አዕኖተ ሀስ ጠረኝሶኔ ጠወ በለስ ዮ ቡጥቻኑተ ሰውይኖተ ኤገተ አቶኔ፤ ሁኩንን እን አኦተ ኢትዮምዮ ጠወ።

ጳውሎስ አንጾካን ጴጥሮሴ ግቡስ

11 ጴጥሮስ ሶርያን ዮ አንጾክ ከተመ አሜቶ ወክት ቤሾቤቺሃ ብሬስ እቶንቲሁ ሀንቅያበእ ይዮንስ።

12 ያቁብ ሶኮስ መት-መቼ መኑ አንጾክ ከተመ አሜቶተ ብርተ አይሁዲ እህበ መኒን ሜጡብ እተኖት እቅ፤ እስ አሜቶች ኤተሮን «አይሁዲ እህቡ መን አዲች አመዕንቶእሩ ጡርከመሙ ሀስሰኖስ» ይታ አይሁድ አመዕናኑተ ዋጅት ኤተሩ ዋልት አይሁዲ እህበ መኒች አደ እኩ።

13 አይሁድ አዲች እኩ አመዕናኑት ጴጥሮሴ ሉስተ አዋንቶኤ፤ ሁኩን ዋሉ ፈቃን በርናባሴሃ ጣንሰዮ እቅ።

14 ጠወ እኮጎሬ እሰገ ተሽት ላገ ሀንቁን ሄኡ ሆጉስ ለዕዮም ወክት ጉዕማንከ መን ብሬን ጴጥሮሴ «እት አይሁዳውቹ እከን አይሁድ ሴሪን እሁዕነ አይሁዲ እህበ መን ሴሪን ሄኣንቲት፤ ህከረ አይሁዲ እህቡ መኑ አይሁድ ሴሪን ሄኦተ ሀት ግዳጅሳንትሳት?» ይዮንስ።

አይሁዲ እኮሁለክ እህቡ መኑ ጡመኖሁ አመዕነቲን እሁስ

15 ነኡ እለንሹኔ አይሁዳ ቤሉ ጨበኛ አይሁዲ እህቡሃ መነበእ።

16 ጠወ እኮጎሬ መኑ ፈየ እህኖሁ መሲህ ኢሳን አመዕነንት ቤሉ ሕገ አገሪን እሁ ሆጉስ ደንጋም፤ ነኡ ሕገ አገሪን እሁዕነ መሲሁ አመዕነን ፈየ እንኮተ መሲህ ኢሳን አመዕነኖም፤ አዲሁ ተወራት ሕገ አገሪን ፈየ እህኖበእ።

17 መሲሂን አመዕነን ፈየ እንኮተ ሀሱኔ ነኡ ገዉንኩኔ ጨበኛኑተ እህኔ ለሊሰኖ፤ ህከረ ጨብ አዕኖተ አእኖኔሁ መሲሁት ዩሃንዶ? ሆሮን ህትጎተበእ።

18 እን ገዉንኩኤ ድጃም ሕገ ፈንቀሽ መክሳሚሃ እኩምጎሬ እን ገዉንኩኤ ሕገ አገርባሃ እሁኤ ተሬገጥሲሳሚት ዩሃን።

19 እን መሲህን ሜጡብ ስቀለምምገ ዋለእምምቤቺሃ መገኒሃ ሄኦተ ይ ሕገ ሬሆን መለዕለም ጌስ ሕገች አደ እኩም።

20 ከኒች ኤተሮን መሲሁ ኢ ኣዜን ሄኣኖ ቤሉ እን ገዱሀኤ ሄኣምያበእ፤ ቴሁ ጅሰሚን ሄኣሚሁ ኢቴኤለከ ኢተኔሃ ገዉስ ህግሽ ኣሴ መገን ቤቶን አመዕነን ደገመኖ ሄእኒት።

21 ህካን እኮቤቺሃ መገን አሰቱተ ተሰ ቤሳምበኣ፤ መኑ ፈየ እሀኖሁ ሕገ አገሪን እኮቶ መሲሁ ከልበንከ ሬዮኡ ዩሃን።

3

መኑ ፈየ እሀኖሁ መሲህን አመዕኒን እሁሰ

1 አዕኑ ኩ ገዋኑት ገለትይ ባድ መኑ! አዬት ሲረ አዕይ ሉሰሾህዕኔሁ? መሲህ ኢሰ መሰቀል አሌን ሰቀለም ብሬንከክዕኔ ዮሀንገ ኩለምህዕኔ እቅ።

2 ክዕኔቶ ደጎተ ሀሳሚሁ ጠለዕል መቼ ጠወዪት፤ ጠሊሊ አያነ ቶጌንታሁ ሕገ አገርኒትንዶ ህከረንገ ተሸት ላገተ ሞጮጭቱን አመዕንኒት?

3 አዕኑ መገን አያኒን ጀመርቱን ቱሱ ገይክዕኔ ዋልቃን ሹልቶኖተ ሀሴነንታት፤ አደ ኬንከ ኢሊ ገዋኖተ!

4 እንጂል መሳን ቶጌንተ ኦርሸት ጉዕሙንኩ ተሰ እክ ፈቆ ዩሃን? ህካን ኦቴንተገሬ ሀንቅንከ ተሰ እክ ፈቆኡ።

5 መገኑ ጠሊሊ አያነ ኦሰኖህዕኔሁለከ በላንከክዕኔ አጀብሲሰኖ ጠወ እአኖሁ ሕገ አገርቱንተቤቺሃትንዶ? ህከረንገ ተሸት ላገተ ሞጮጭቱን አመዕንቱንተቤቺሃት?

6 «እብራሂም መገኖን አመዕኔእ፤ ህከ አመዕነትሰ መሳን መገኑ ፈየ አዕይ ዋለዕዮሰ» የመም ከተበሞጋት።

7 ህካን እኮቶ አመዕንታእሩ እብራሂም እለተ እሁሰ ደጌ።

8 መገኑ አይሁድ እኮበእ መነ አመዕነቲን ፈያኑተ አአኖገ ጠሊሉ መጻፉ ወዕናንከ «ኡመቱ ጉዕሙንኩ ኪን ማሰአመኖ» ይ ሄጭ እብራሂሚሃ ተሸት ላገተ ኩሎሰ።

9 ህካን እኮቤቺሃ አመዕንታሩ ጉዕሙንኩ አመዕኔ እብራሂሚን ማሰአንቶእሩን።

10 «መሰ ሕግ መጻፉን ከተበሞ ትዛዝ ጉዕሙንከ ጠረኝ አገርባሁለከ ሄእባሁ ጉዕሙንኩ ቦሮረሞእሃን» የመም ከተበሞቤቺሃ «ሕገ አገሪን ፈያኑተ እንካም» ይታእሩ ጉዕሙንኩ ቦሮረንቶእሩን።

11 «ፈዩ መንቺ አመዕነቲን ሄኡ ደአኖ» የመም ከተበሞቤቺሃ አዪሁ ሕገ አገሪን መገን ብሬን ፈየ እሀኖበኢሃ እሁሰ ለልዮእሃን።

12 ሕጉ አመዕነት አሌን ኡርዮእሃበአ፤ መሰንትሰ «መንቹ ሕጋን ሄኦተ አታለኖሁ ሕግ ትዛዝ ጉዕመንከ አገረኛራት» የመሞ ከተበሞኤ።

13 «ሀቅ አሌን ሰቀለሞ ሬሀኖሁ ጉዕመንኩ ቦረረሞእሃን» የመሞ ከተበሞቤቹሃ መሲህ ኒተኔሃ ቦረረሞ መንቹ እክ ሕጊን አሜተኖ ቦረረች ዋዦኔ።

14 ሁኩን እኮሁ መገኑ እብራሂሚሃ ኣሴ በረከተ መሲህ ኢሰ አዲን አይሁደ እህቡ መኒሃ ኢሎተለከ ነኡን መገኑ ኣሳንክዕኔ ዬ ጠሊሊ አያነ አመዕነቲን ቶንጎታት።

ሕጉ ተብሴ ላገተ ሻርባሃ እሁሰ

15 አመኤ ኦሶ! ህንዴ ከ ጠወ መንቤቾን ርሰሞ ጠዋን ሜጡብ ለዕዬ፤ መቼ መንቹ ኣጎ ወኣድ ላገተ ቶጌማች ኤተሮን አዪሁ ቤሶተ ህከረንገ በርጎተ አታለኖበአ።

16 መገኑ እብራሂሚሃለከ እሰ ዘሬተ ልግብ ተብሴ ላገተ ኣሴኢሁ ከን ሃለንት፤ ተብሴ ላገት ልግብ እኮገ እዕይ «ዘሬተክዕኔ» የኖበአ፤ ጠዉ እኮጎሬ መቲሃ እኮገ እዕይ «ዘሬተክ» የኖ፤ ሁኩን «ዘርክ» የመሞሁ መሲህት።

17 ኣን ያሚሁ ከኒት፤ ተብሶሁ እብራሂሚሃ ኣሰሞች ሾል ጥብተ ሰጃ ዘመኒች ኤተሮን ኣሰሞ ሕጉ ዋዕናሃ መገኑ ተሬገጭ ኣሴ ወኣድ ላገተ ሻር ተብሴ ላገተ ቤሶተ አታለኖበአ።

18 መቱርቹ ረገኤኖሁ ሕግ መሳን እኮ እቃ ተብሴ ላጋን እሁሰ ፈቀኖ እቅ፤ ጠዉ እኮጎሬ መገኑ ረግተ እብራሂሚሃ ኣሴኢሁ ተብሴ ላጋኒት።

19 ህከረ ሕጉ ኣሰሞሁ ሚሃት? ሕጉ በርገሞሁ እብራሂሚሃ ተብሴን ኣሰሞ መት ዘርት አሜቶተ ኢሊ ኒ ጩቢች ኬዕይት፤ ሴፋንኩ መላይከ አዲን መንለከ መገን በላን ሄዕዮ መንቹሃ ኣሰሞ።

20 እሁን ቤሉ በላን እክ ሀራርሰኖ መንቹ ለሞ አዲንካት ቤሉ ጠለዕል መቶ አዲሃበአ፤ እኮጎሬ መገኑ ሚጥቹሃን።

ሕጉ ሚሃ ኣሰሞ

21 ህከረ ሕጉ መገን ተብሴ ላገተ ግበኖንዶ? ሆሮ ግበኖበአ! ሄኡ ደገመኖ ሕጉ ኣሰሞ እቃኔተ ፈየ እሁ ሕግ አዲን ደገመኖ እቅ።

22 ጠዉ እኮጎሬ መሲህ ኢሰን አመዕነን ደገመኖ ተብሴ ላገት አመዕነታሁኡተ ኣሰንቶተ ጠሊሉ መጻፉ የኖ ሃለን ኣዱንያ አሉ ጉዕመንኩ ጩቢሃ ጠገንት ጩብ ኡሱረኝ እኮኤ።

23 አመዕነቱ አሜቱዕናን ብርተ ሕጉ ጠቅዮኔ እቅ፤ ሁኩንን አመዕነቱ ለሎተ ኢላ ሕጉ ጡፍ አፎኔ እቅ።

24 ከን ሃሊን አመዕነቱን ፈየ እንኮተ መሲህ አሜቶተ ኢላ ሕጉ አገራንቹኔ እኮ እቅ።

25 እኮጎሬ ቱሱ አመዕነቱ አሜቸቤቺሃ ሕጉ አገራንቹኔ እሁሰ ፈቆኡ።

26 መሲህ ኢሳን አመዕኒን ጉዕሙንኩክዕኔ መገንተ አለ፤

27 ጠመቀንቱን መሲሂን ሜጡበ እኬንተሩ ጉዕሙንኩ መሲህ ኦድኖገ ኦደኤንታኡ።

28 ጉዕሙንኩክዕኔ መሲህ ኢሲን ሜጡ እኬንተቤቺሃ አይሁድችለከ ግርክቺ፣ ሮስችለከ ሰዎልድቺ፣ ጎንለከ ሜንት በላን አደደመት ዮበኢ።

29 አዕኑ መሲህረ እኬንታች ኡብራሂምተ ዘር፤ ተብሴሰ ላገ መሳን ረገኣኑታን።

4

መገን ኦሱተ እህኔተኔሃ

1 ቲሁ ያሚሁ ከኒት፤ ረገአኖሁ ቀወ ጨል እህኖ ወክት ደንያተሰ ጉዕሚንከ ቀርቼ እኮ እቃ መቶርቺንከሰ ሮስቺች አደ እህኖበኢ።

2 ጠዉ እኮጎሬ እኩስ ቀደሮ ወክቱ ኢሎተ ኢላ አገርታሁኑኡለከ ኤገተ ኣሴመ መን አንጋን አገረኖ።

3 ህትን ነኡ አያን ጠዉሃ ጨለገ ዮም ወክት ከን ኣደንያ አሌን ዮ ሴሪሃ ጠገም ሮስ እንኮም እቅ።

4 ጠዉ እኮጎሬ ቀደሮ ዘማኑ ኢሌ ወክት መገኑ ቤቱሰ ሶኮኔ፤ እሰ ሕጊች ዋሮን እክ መንቸች እለሞ፤

5 ህካን አዕዮሁ ሕግ ኣዜን ዮእረ ዎዙተለከ ነኡን መገን አለተ እንካምገ አኦታት።

6 መገን አለተ እኬንተቤቺሃ መገኑ «አበ» ዮን ገአኖ ቤትሰ አያን ቀልቢሃኔ ሶኮ።

7 ህካን እኮቤቺሃ ከኒች ኤተሮን ቤቱሃን ቤሉ ሮስሃበኢ፤ ቤቱሰ እኮንቲች መገኑ ረገኣንቹ አዕዮሄ።

ጳውሎስ ገላትዮ ባድ መኒሃ ዮሰ ጭንቀተ

8 ከኒች ብርተ መገኑ ደጉ ሆግክዕኔ መሳን ክልቀቲንከሰ መገኑ እኮበእሁኑኡተ ሮስ እኬን ጠገንቱንታ እቅ።

9 እኩገሬ ቴሱ መገኘታቸውን ያሳያል፤ በትሽን መገኘታቸውን ያሳያል፤ ህክረ ሀት ላፋለክ ሂላ ኣዲንያ አል ሴርቤቹ ፈንቀልቴን? ሀት ለንኪሃ እስ ርስ እኮኖተ ሀሴነንታት?

10 አዕኑ በሪሃ፣ አገኒሃ፣ ወክቲሃለክ ዘማኒሃ ጠረኝሴን አበ ኬዕምኝ ኣቴነንታት።

11 ክዕኑ በላን ሆሳን ሆሳሚሁ ጉዕሙንኩ ተስ እክ ፈቀኖ ይ ዋጃም።

12 አመኤ ኦሶ! አን ክዕኑን እኮምቤቹሃ አዕኑሁ አገ እኬ ይ ኡጫንክዕኑ፤ አዕኑ መቼ ብድልሃ ኢልሴንታኤበአ።

13 ዋዕኑ ወክት ተሸት ላገተ ክዕኑሃ ዱዱብሶተ እድል ደኤሚሁ ጥዘነ መሳን እሁስ ደገነንተ።

14 ሄንከ ጥዘነኤ ፊተነተ እኮህዕኑገሬ ህንቁንታኤበአ ህክረንገ ሽግግ ይቴንታኤበአ፤ በትሽን መገን መላይኬቹ ቶጌነንተህኒገ አቴን ቶጌንታኤ፤ ህትን መሲህ ኢስ ቶጌነንተህኒገ አቴን ቶጌነተኤ።

15 ከኒች ዋዕናሃ ሄኦህዕኑ መንዲኦት ሀከቤቹ መርቶኡ? አታልሲሾህዕኑ እቃ አልክዕኑ ፋሽቴን ኣቴነንተኤገ አን ገዉንኩአ መሰከራም።

16 ህክረ ቴሱ ሀንቅ ኩሎንክዕኑቤቹሃ ዲነክዕኑ እኮምንድ?

17 ዋሉ መኑ ክዕኑትኤሃ ጨነቀንት ሰውይታኢት፤ እሁን ቤሉ ህካን አታኢሁ ጡመ ጠዊሃበአ፤ እስ ሃሽኣቴት አዕኑ ኒች አደ እኮኖታትለክ እስተኔሃ አበ ሰውይቶኖታት።

18 ሰውቱስ ጡመ እኮች ጠረኙ ጉዕመ ወክት ጡመሃን፤ ጠዉ እኩገሬ ኩ ጠረኝመክዕኑ አን ክዕኑን ሜጡብ ሄኣም ወክት ጠለዕል እሁንከ።

19 ኢ ኦሶ! መሲህ ክዕኑ ኣዜን ለሎተ ኢላ ቴህ ክዕኑትኤሃ ኒጠን አበ ጨነቀማሚት።

20 ክዕኑሃ መ እኡ ሀሲሰኖኤገሬ ደጉ ሆግንከኤ ጉረተ ኣጋዕኑ አበ ጨነቀም፤ ቴሱ በላንከክዕኑ ደገም አደደ አፎን ጠወዕኖም እቃ ሄንከ ኢታም እቅ።

አጋረለክ ሣራ ምሳልተ

21 አዕኑ ሕጊሃ ጠገንቴን ሄኢሃ ሀሴነንተሩ ህንዴ ኩሉኤ፤ ሕጉ የኖሃ ሞጮጭቴነንተበእንድ?

22 ጠሊሊ መጻፉን «አብራሂሚሃ ለም እለት ሄኦስ እቅ፤ መቱስ እለሞሁ ርስቶ መንቸቶ እሁን ዋሉሰንገ ሰዋልድቶ መንቸቸት» የመም ከተበሞኤ።

23 ርስቶ መንቸ ቤቱ እለሞሁ ማል ሄዕላቸገ እሁን ሰዋልድቶ መንቸ ቤቱ እለሞሁ ኣስንቶ ተብሴ ላጋኒት።

24 ኩ ለሙ ሜንቱ ለሞ ወኣድ ላገተ ለሊስኖቤቹሃ ኩን ሞሳሊገ ለለኖሃን፤ መትሴ ወኣድ ላገተ ሲና ዬኖ ቆታች እከን ርሶማተ እካ እለተ እልታእታን፤ እሴን አጋራት፤

25 አጋር አረብ ባዶን ዮ ሲና ቆተተ ሞሳልተ እቅ፤ ህካን እኮቤቹሃ ቴሱ ዮ ዬሩሳሌሚን አጉጠንታኦ፤ እሴን እላንተሴን ርሶማን ሄኣእታን።

26 አሊች ሰሜች እኮእ ዬሩሳሌሙ ሰዎልድቸታን፤ እሴን አመተኔ።

27 «አት ጎደቡ ዮሄበኢት ተሽ ዩንኬ!

አት አልቶተ ኒጥ ከሲባት ሕልል!» ይ፤

ሞኒ አኑ ዮሴ መንቸች በትሽ

ሞንሴ አኑ አጉራንሴ ዮ መንቸተ ልግብ እለት ዮሴ» የመሞ ከተበሞኡ።

28 አመኤ ኦሶ! አዕኑ ቴሱ ኢሳቅገ ተብሴ ላገተ አለ።

29 ጠዉ እኮጎሬ ህከ ወክት ማሊን እለሞሁ ጠሊላ አያኒን እለሞሃ ሽሬገን ከበሪሁ ህትዩንት።

30 ጠዉ እኮጎሬ ጠሊላ መጻፉ የኖሁ መርቸሃን? ጠሊላ መጻፉ «ሮሰቹት መንቹት እልቶ ጨሉ ሰዎልድቹት እልቶህኒን ሜጡበ ረገኣኖበኢቤቹሃ ሮሰቹት ጨሊንከሴን ሜጡበ ሸር» የኖ።

31 ህካን እኮቤቹሃ አመኤ ኦሶ! ነኡ ሰዎልድቸተ አለ ቤሉ ሮሰቸተ አለበኦ።

5

መሲህን ደገነታ ሰዎልድመተ

1 መሲህ ሰዎልድማን ፋሼኔሁ ሰዎልድማን ሄዕኖታት። ህካን እኮቤቹሃ ጠረኝቴን ኡርዬ ቤሉ ለንኪሃ ፈንቀልቴን ሮሰ እኬን ጠገንቶኖቼ።

2 ቴሱ እን ጳውሎስ ያንክዕኔሁ ጡርከመንቴንተ ጎሬ መሲህ መቱርቹሃ ደግለለኖህዕኔበኦ፤

3 ጡርከመመኖሁ ጉዕሙንኩ «ሕገ ጉዕሙንከ አኣተ ግዳጁ ዮሰ» ይ ለንኪሃ ጠረኝሳሞ።

4 አዕኑ ሕገ አገርቴንን ፈይቶኖተ ሀሴነንተሩ ጉዕሙንኩ መሲህቸ አደ እኬንታኦ፤ መገን ኣሰቶችሰ ፋልቴንታኦ።

5 ጠዉ እኮጎሬ ነኡ መገን አያኒን ፈይመ ተብሳሃ አመዕነቲን አገዕሪናሞ።

6 መሲህ ኢሲን ሄኤማች ጡርከመሙ ህከረንገ ጡርከመሙ ሆኑ ደግለለኖበኔ፤ ደግለለኖሁ ኢታን ለለኖሃ አመዕነቱ።

7 አመዕነቱን ጡመገ ሃንቲነታት እቅ፤ ቴሱ ሀንቂሃ አዘዘንቲንበገ ከሞህዕኔሁ አዬት?

8 ህትኔ ሸዘነት ገኤህዕኔ መገኒች አሜቶበአት።

9 ቀቅቼ ራጭቱ ቡኩተ ጉዕመንከ አቦከኖ።

10 ጠዉ እኮጎሬ ከኒች አደ እኮ ዋሉ ሰውቱ ሄአኖህዕኔበእገ ተሬገጭ ቀርቸን አመዕናም፤ ጉረተ ኣግሰኖህዕኔሁ አዩሁ ፍርደሰ አአኖ።

11 አመኤ ኦሶ! አን ቴሱ ኢሊ ዱዱብሰን «ጡሚሃ ጡርከመሙ ሀሰሰኖ» ይዮም እቃ ቴሱ ኢሊ ሚሃ ሸርታኤ እቅ? ህካን እኮእቀ መሲህ መሰቀሉ መኒሃ ጉፋተ እህኖበ እቅ።

12 ህካን እኮቤቺሃ ኩ ጉረተ ኣግሳህዕኔ መናከት ሀሶ ጎሬ ጡርከመሙ ጠለዕለ እሁዕነ ገዉንኩሰ ፎልሰ ኡለተ ቃርቶ እቃ ኢታም እቅ።

13 አመኤ ኦሶ! አዕኑ ሰዋልድማሃ ገአንቲነታአ፤ ጠዉ እኮጎሬ መት-መቱሰ ኢታን ካደሙን ቤሉ ኩ ሰዋልድመክዕኔ ማል ሃሸአቱተ አቲነንተ መሰተ እሁንከ።

14 ሕጉ ጉዕሙንኩ «ዋሉ መነ ገይክገ አት ኢት» የኖ መቼ ላጋን ጎፎኡ።

15 ጠዉ እኮጎሬ ገገዉክዕኔ ገዕመቀንቲነንለከ እተቀንቲነን በኤነንተበእገ አገዕርዬ።

ጠሊላ አያንለከ ማል ሰውት ሄኤ

16 ቴሱ ጠሊላ አያነ አዎንቲን ሄኤንተ ጎሬ ማል ሃሸአቱተ አቲነንተበእ ያም።

17 ማል ሃሸአቱት ጠሊላ አያን ሃሸአቶን ቶቃቀንታበአ፤ ህትን ጠሊላ አያን ሃሸአቱት ማል ሃሸአቶን ቶቃቀንታበአ፤ ጠሊላ አያን ሃሸአቱትለከ ማል ሃሸአቱት ገገዬሀሰ ባለጋረተ፤ ህካን እኮቤቺሃ አዕኑ ሀሴንተርቼ አቶኖተ አታልቲነንተበአ።

18 ጠሊላ አያነ አዎንቲንተጎሬ ሕጊሃ ጠገንቲነንተበአ።

19 ማል ሃሸአቱት ደገንቶእራን፤ እሰን ዝነተ፥ ሂለ ንጂሰ አኡ፥ ገዉ አገዕሩ ሆኑ

20 ሸርክተ አኡ፥ ኪሉ፥ ዲኖመተ፥ ኦደተ፥ አቄሸተ፥ ኡሙዕርተ፥ ገዉ ኢቱ፥ አደደመተ፥ አድመ አኡ፥

21 ምቀኛውት፡ ሰከሩ፡ መጠረቁ የበለ መንዲኑት አጉዳኦራን፤ ከኒች ዋዕናንከ ጠረኝሽ ኩሎምገን ቲሁ በርግ ጠረኝሽ ኩላንክዕኔ፤ ህትኔ ጠወ አታ መናከት መገን ዋምነቱ አጋበአ።

22 ጠወ እኮጎሬ ጠሊላ አያን ላልቹ አተተ፡ መንዲኑት፡ ወገሬት፡ አደብ፡ ጡምመተ፡ ጡመ ጠወ አኡ፡ አመዕነው።

23 ጎደበ ላፋለከ ገዉ አገዕሩሃን፤ ህትኔ ጠወ ግበኖ ሕጉ የበአ፤

24 መሲህ ኢሰረ እኮእሩ ማለሰ ሄዕላቻንተሰለከ ሃሽኦቶንከሰን መሰቀላን ሰቀልቶኡ።

25 ጠሊላ አያኒን ሄዕናሚሃ እንኮሚች ጠሊላ አያን አዋኖ።

26 መቼ ዋሉ ሂላ ጠዊሃ ኬሰንሰን ገገዉንኩኔ ምቀኝነን ተሳን ቦኑንከ።

6

ገገዉክዕኔ ሀዕላቀው

1 አመኤ ኦሶ! መቼ መንቹ ጩብ አዕይ ደገሞጎሬ አመዕነቲን ጠረኛኑት እኬንተሩ ህትኔ መንቹ ጎደበ ላፍማን ብዝ አዕዬሰ፤ ጠወ እኮጎሬ አቲሁ ህትኔ ፊተናን አጋንተበእገ አገዕር።

2 ክዕኔች መት-መቱክዕኔ ዋልሰ ኬዕምታ እጅነተ እጁን፤ ከን ሃሊን መሲህ ሕገ ዊንሸቲነንተ። *

3 አዪሁ ዋሎ መኒች ቆሀኖርቹ የሰበኢንከ «አን ዋሎ መኒች በተአም» ይ ሰውዬጎሬ ገዉሰ ጣንሰኖት።

4 ጠወ እኮጎሬ ገገዉንኩሰ ገይሰ ሆጉተ መረመር ለኡን፤ ህከኒች ኤተሮን ገዉሰ ዋሎ መኒን ሜዛኝ እሁዕነ ጠለዕል ገይሃሰ ድከአኖርቹ ደአኖ።

5 መሰንትሰ ገገዉንኩሰ ገይሰ እጅነተ እጁ ሀሰሰኖ።

6 ላገሰ ተማረኖ መንቹ አስተማርቺንከሰን ሜጡበ ጡመርቹ ጉዕመንከ ቤቀውን።

7 ገዉክዕኔ ሉሲሶኖቹ፤ መኑ ምደኖሁ ዉጮሃት፤ አዪሁ መገኖን ቀለደተ አታለኖበአ፤

8 ማለ መንዲሲሶተ ዉጠኖሁ ማሊችሲ ሬሁተ ምደኖ፤ ጠሊላ አያን መንዲሲሶተ ዉጠኖሁ ጠሊላ አያኒች ዘላለም ሄኡ ምደኖ።

9 ተብሳ ሙርንባች ወክቱ ኢሌሃን ዉጠተ ጭምእዕናምቤቺሃ ጡመ ሆጉተ አኡ አጉርኑንከ።

10 ቲሱ ጡሙ ወክቱ የኔቤቺሃ መኒሃ ጉዕሚንከ በትንሰ አመዕንቶ መኒሃ ጡመ ጠወ አዕኖ።

* 6:2 ዊንሸቲነንተ- መት-መቱ እንክሊመ ክታበት «አዕዬ» ይታአ።

ጎፍሜ ሸዘነተለክ ወገሬት

11 ሀትኔ ሎርሎረ ፍደሊን ገይኤ አንጋን ከተቦንክዕኔገ ለዕዬ!

12 ጡርከመንቶኖተ ግደጅሳእሩ አብሊን ጡመ አጉድ ለሊሃ ሀሳእተ መናከ፤ ህካን አታኢሁ መሲህ መሰቀል መሳን ሸረንታበእገ ሰውይቲት።

13 እሰ ጡርከመንቶኖተ ሀሳኢሁ ጡርከመምንከክዕኔ ቦንቶታት ቤሉ ጡርከመንቶሩ ገዉንኩሰ ሕገ አገርቶበእ።

14 ቀርቼሃኔ መሲህ ኢሰ መሰቀል ቤሉ ዎሎርቸን ድከኤ ኢች ቁዕሩን፤ ከን መሰቀል መሳን ኣዱንያ አሉ አደ እኮኤ፤ አኒሁ ኣዱንያ አሊች አደ እኮም።

15 ህካን እኮቤቺሃ ጡርከመሙ እኮ ጡርከመሙ ሆጉ መቱርቸሃ ደግለለኖበእ፤ ደግለለኖሁ ሃዕሮ ክልቀት እሆሃን።

16 ከ ትዛዝ አዎነኖሀኒሃ ጉዕሚንከለከ መገን ዎገነ እኮ ሀንቅ እሰራኤሊሃ ወገሬቱለክ ማርቱት እኩን።

17 ጅሰምኤ አሌን ዮ ገረፌመኤ መላት ኢሰ ካዲንቹ እሁኤ ለሊሰኖቤቺሃ ከኒች ኤተሮን አዪሁ ኦርሱንከኤ።

18 አመኤ ኦሶ! ቀርቼኔ መሲህ ኢሰ ኣሰቱት ክዕኔን ሜጡበ እኩን! ኣሚዕን።

ሃዕር ወኣድ መጻፈ

Alaba-K'abeena: ሃዕር ወኣድ መጻፈ (New Testament)

copyright © 2025 The Word for the World International

Language: Alaba-K'abeena (Alaba-K'abeena)

Contributor: The Word for the World International

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-04-26

PDF generated using Haiola and XeLaTeX on 25 Apr 2025 from source files dated 26 Apr 2025

740fd658-7c09-56dd-a374-995d21c2d66d